

दिनांक 05.05.2025 समय: 18.48 बजे

- ए.सी.बी. बागीदौरा रा विधायक जयकृष्ण पटेल कानी ऊं कथित तौर ऊं लीरीजी 20 लाख रुपया री रकम बरामद कीनी—आरोपित विधायक पटेल ने दो दिन री रिमांड माथे भेजी ज्यों
- मुख्यमंत्री भजनलाल शर्मा तीन दिन रा गुजरात दौरा सारु गया—प्रवासी राजस्थानी सम्मान समारोह मांय शिरकत कीनीं
- रेलमंत्री अश्विनी वैष्णव जोधपुर रेलवे स्टेशन रो दौरा कीनी—कह्यो—देश मांय रेलवे स्टेशनों रो विकास अर मुसाफिरां रा सुबीतां मांय बधोतरी करी जा रही हैं
- राज्य मांय आज ई केई ठौड़ां आंधी अर बारिश—आवता चार—पांच दिन पश्चिमी विक्षोभ रो असर जारी रेहवण रा आसारं

000

भ्रष्टाचार निरोधक ब्यूरो बागीदौरा रा विधायक जयकृष्ण पटेल कानी ऊं कथित तौर ऊं घूस रा तौर ऊं लिया ज्या 20 लाख रुपया आज बरामद कर लीना, हालांकि एसीबी रकम बरामदगी री ठौड़ रो खुलासा नी कीनी हैं ध्यानजोग है के भारत आदिवासी पार्टी रा विधायक जयकृष्ण पटेल ने रंग्या हाथां पकड़बा री कार्यवाही री बगत एक जणो घूस री रकम ले र भाग ग्यो हों ई बीचे, विधायक पटेल ने आज अदालत सामी पेश करी ज्यों अदालत विधायक अर वां रा एक रिश्तेदार ने दो दिन तांई रिमांड सारु भेज दीनां अदालत मांय पेशी पाछे विधायक पटेल खबरनवीसां सागे बातचीत करता थकां कह्यो के वे बेगुनाह है अर वां ने फंसाया जा रह्या हैं ए.सी.बी. रा महानिदेशक रवि प्रकाश मेहरड़ा विधायक रा रेहवास ऊं हासिल करी ज्या सी.सी.टी.वी. फुटेज सीज कर दीना हैं

.....

मुख्यमंत्री भजनलाल शर्मा आज तीन दिन रा दौरा सारु गुजरात पूग्यां श्री शर्मा केवड़िया मांय भाजपा रा सांसदां अर विधायकां सारु राख्यी ज्यी सिखावण कार्यशाला मांय शिरकत करेलां इण मांय नुवा चुण्यी ज्या सांसदां अर विधायकां ने संसदीय कामकाज री सिखावण दी जावेलां मुख्यमंत्री वड़ोदरा मांय प्रवासी राजस्थानी सम्मान समारोह मांय शिरकत कीनीं ई मौके वे राजस्थान अर गुजरात रा रिश्तां री मजबूती सारु करी जा रही कोशिशों री जाणकारी दीनीं

.....

मुख्यमंत्री इण ऊं पैली आज जयपुर मांय वां रा रेहवास माथे जनसुणवाई ई कीनीं

000

सुप्रीम कोर्ट वक्फ संशोधन कानून 2025 ऊं जुड़ी सुणवाई अब 15 मई ने करेलां मुख्य न्यायाधीश जस्टिस संजीव खन्ना री अगुवाई मांय आज तीन जजां री पीठ ई मामला मांय सुणवाई कीनीं ई दौरान मुख्य न्यायाधीश कह्यो के मामला मांय अंतरिम आदेश देवण ऊं पैली लम्बी सुणवाई री जरूरत हैं सीजेआई कह्यो के वे आगला मुख्य न्यायाधीश जस्टिस बी.आर. गवई री पीठ सामी ओ मामलो रखेला अर वां ने मुद्दा रा बारा मांय जाणकारी हासिल करण सारु समय देवेलां ध्यानजोग है मौजूदा सीजेआई खन्ना 13 मई ने रिटायर व्हे रह्या है जद के न्यायमूर्ति गवई 14 मई ने मुख्य न्यायाधीश रो काम—काज संभाळेलां ई बीचे, केंद्रीय मंत्री भूपेंद्र यादव कांग्रेस माथे वक्फ संशोधन कानून रा बारा मांय सियासत करण रो आरोप माण्ड्यो हैं वे आज नई दिल्ली मांय अल्पसंख्यक बुद्धिजीवियों रा सम्मेलन मांय बोल रह्या हां श्री यादव कह्यो के बिल रा बारा मांय कांग्रेस री कोई ठोस राय नी ही, जद के केन्द्र सरकार अल्पसंख्यक समुदाय सारु सामाजिक, माली अर सियासी न्याय करणो तैय कीनी हैं

.....

000

राजस्थान हाउसिंग बोर्ड की ओर ऊं काल ऊं 28 मई ताई जयपुर, जोधपुर, कोटा, बाड़मेर, भीलवाड़ा अर बांसवाड़ा मांय आवास मेळा लगाया जावेलां ई दौरान लोग हाउसिंग बोर्ड कानी ऊं बनायी ज्या मकान अर फ्लैट 50 फीसदी ताई की छूट सागे खरीद सके हैं जयपुर मांय ओ शिविर जोबनेर रोड माथे महला आवासीय योजना मांय सरू कर्यो जावेलां हाउसिंग बोर्ड रे मुजब जयपुर मांय फ्लैट्स की सरूआती कीमत 4 लाख 70 हजार 500 रूप्या तैय करी ज्यी हैं ई सारू हाउसिंग बोर्ड की आधिकारिक वेबसाइट रे जरिये ऑनलाइन तरीका ऊं अर्जी दी जा सके हैं

000

रेलमंत्री अश्विनी वैष्णव आज जोधपुर मांय रेलवे स्टेशन माथे चाल रह्या विकास रा कामां रो जायजो लीनों वे स्टेशन की डिजाइन, गाड़ियां ऊबी करण अर मुसाफिरां रा सुबीता ऊं जुड़ी जाणकारियां लीनीं श्री वैष्णव वठे मौजूद मुसाफिरां सागे बातचीत कर र वां की राय ई जाणीं ई पाछे खबरनवीसां सागे बातचीत करता थकां रेल मंत्री कह्यो के स्टेशनां माथे बुनियादी ढांचा रा विकास सागे सुबीता बढाया जा रह्या हैं

.....

000

केन्द्रीय कानून मंत्री अर्जुनराम मेघवाल आज नई दिल्ली रा जोधपुर हाउस मांय राज्यपाल हरिभाऊ बागडे सागे मुलाकात कीनीं ई दौरान दोन्यू राज्य रा विकास अर दूजा मुद्दां माथे चर्चा कीनीं

000

राज्य मांय ईसरदा बंधा रो काम मिशन मोड मांय कर्यो जा रह्यो हैं सवाईमाधोपुर अर दौसा जिला मांय पाणी की पूर्ति मुहैया करावण सारू ओ बंधो घणो खास हैं ईसरदा बंधो टोंक जिला की उनियारा तहसील मांय बनास नदी माथे दो दौर मांय बनायो जा रह्यो हैं बंधा रो एक हिस्सा सवाईमाधोपुर जिला रा ईसरदा अर दूजो हिस्सा टोंक जिला रा बनेठा गांव मांय हैं ई चौमासा मांय बंधा मांय पाणी आवण ऊं एक हजार ऊं बत्ता गांवां अर छह शहरां ने पीवण सारू पाणी मिल सकेलां आ परियोजना पाणी की परेशानी दूर करण सागे ई बीसलपुर बंधा ऊं छोड़्या जावण वाळा बत्ता पाणी अर बिरखा रे कारण बनास नदी मांय आवण वाळा पाणी रो ई बेहतर प्रबन्धन तैय करेलां ई बंधा ऊं आवता बगत मांय रामजल सेतु लिंक परियोजना यानि संशोधित पीकेसी-ईआरसीपी रा तैत जयपुर कने रामगढ़ बंधा ने ई भर्यो जा सकेलां

000

राज्य की मशहूर फळी सांगरी ने जी.आई. टैग मिल्यो हैं ई उपलब्धि ऊं सांगरी ने बधावो देवण मांय मदद मिलेला अर इण ने दुनिया मांय ओळखाण मिल सकेलां पेश है एक रपट—

.....

000

राज्य मांय पश्चिमी विक्षोभ रा असर ऊं आवता चार-पांच दिन ताई आंधी-बारिश चालती रहवण रा आसार हैं ई दौरान बाड़मेर, जालौर अर आरे-सारे रा हलकां मांय कटे-कटे तेज बारिश की संभावना हैं ई सागे ई कटे-कटे तेज हवा चालण सागे बिरखा व्हे सके हैं चित्तौड़गढ़, भरतपुर, चूरू, पाली अर झालावाड़ समेत न्यारी-न्यारी ठौड़ां ऊं बरसात रा समाचार है, हालांकि आंधी अर तेज बायरा ऊं केई ठौड़ां नुकसान ई व्ह्यो हैं बाड़मेर जिला मांय आज लगातार दूजा दिन आंधी चालण पाछे तेज बिरखा व्हीं गडरा रोड, चौहटन, रामसर अर शिव हलका मांय रूखड़ा उखड़ ग्यां कोटा मांय ई अंधड़ अर तेज हवा ऊं बिजली रा खम्भा अर रूखड़ा पड़ ग्यां म्हाणा खबरनवीस बतायो के ई कारण बिजली की पूर्ति मांय अड़चन आयीं भरतपुर मांय बरसात पाछे केई ठौड़ा पाणी भर जावण ऊं आवण-जावण माथे असर पड़्यो पाली मांय व्ही तेज बिरखा पाछे परशुराम महादेव मांय झरना चालण लाग्यां

000

सीकर जिला मांय नेशनल हाई-वे नम्बर 58 माथे आज फतेहपुर हलका रा गंगापुरा गांव कने एक जीप बेकाबू व्हे र पलट जावण रे कारण दो जणां की मौत व्हे गयी अर 15 जणां जखमी व्हे ग्यां नोहर रा अ लोग जीणमाता रा दर्शन कर र पाछा जा रह्या हां

000

प्रतापगढ़ पुलिस छोटी सादड़ी मांय एक ट्रक ऊं 785 किलोग्राम गैर कानूनी अफीम डोडा चूरो ज़ब्त कीनों पुलिस मुख्यालय री एंटी गैंगस्टर टास्क फोर्स कानी ऊं मिली जाणकारी रा आधार ऊं करी ज्यी ई कार्यवाही रे दौरान एक जणा ने गिरफ्तार करी ज्यों ज़ब्त करी ज्यो माल रो मोल करीब सवा करोड़ रुपया मानी ज्यो हैं पुलिस रे मुजब आरोपित रो रिश्तो तस्कर कमल राणा गैंग ऊं व्हेवण री शंका है अर वो लम्बा बगत ऊं दूजा राज्यां ऊं नशीली चीजां ला र प्रदेश मांय न्यारी-न्यारी ठौड़ां पूगा रह्या हों पाली मांय ई पुलिस नशीली चीजां रे खिलाफ़ चलाया जा रह्या ऑपरेशन भौकाल रा तैत एक कार ऊं सवा तीन सौ किलोग्राम गैर-कानूनी डोडा पोस्त बरामद कीनों